

中國方志叢書·華中地方·第九二號

據

聶憲藩等修（民國）
黃佩蘭等纂（民國）
民國十三年刊本

影印

安徽省

渦陽風土記

(二)

成文出版社有限公司印行

60/875
sk8/09



10094181

中華民國五十九年 月壹一版

渦陽風土記

全二册

發行人：**黃 成 助**

台北郵政信箱二二六〇五號

出版者：**成文出版社有限公司**

台北郵政信箱二二六〇五號

台北市羅斯福路三段279之二號

電話：三七〇一三二號

印刷者：**東南印製廠有限公司**

和平西路二段70巷83弄29號

內政部登記證內版台業字第一一四七號

渦陽縣志卷十二

渦陽縣知事葉縣黃佩蘭撰

志人物職闡幽若惟是炫人聽睹者球在序珠沈淵矣其或窮大而失其居作者之志荒讀者之興索以之示後不其慎乎渦志晚出於先哲之已經著錄者蓋審慎而約取之是編所載往往剔蘚洗垢旁搜類測求之意中時竟有獲之意外者比年一再溯洄渦肥之菁臆不止斯乃適稅於斯矣作人物傳

人物傳上

周

蹇叔

蹇叔宋之錕人秦伯得百里奚欲任以政奚讓曰臣不如臣友蹇叔賢而世莫知隱居於錕臣固深知其賢也秦伯具厚幣迎之以爲上大夫與奚同心輔政用基霸王之業

漢

徐防

徐防字謁卿沛國錕人祖父宣爲講學大夫以易數授王莽父憲亦傳宣業防少習父祖學永平中舉孝廉除爲郎防體貌矜嚴占對可觀顯宗異之特補尙書郎職典樞機周密畏懼奉事二帝未常有過和帝時稍遷司隸校尉出

爲魏郡太守永元十年遷少府大司農勤曉政事所在有
跡十四年拜司空防以五經久遠聖意難明宜爲章句以
悟後學上疏曰且聞詩書禮樂定自孔子發明章句始於
子夏其後諸家分析各有異說漢承亂秦經典廢絕故立
博士十有四家漢官儀曰光武中興恢弘稽古易有施孟
梁丘賀京房書有歐陽和伯夏侯勝建詩
有申公轅固韓嬰春秋有嚴彭祖顏安樂禮有戴德戴聖
凡十四博士太常差選有聰明威重一人爲祭酒總領綱
紀甲乙之科以勉勸學者所以示人好惡改做就善者也
伏見大學試博士弟子皆以意說不修家法私相容隱開
生姦路每有策試輒興諍訟論議紛錯互相是非孔子稱
述而不作又曰吾猶及史之闕文疾史有所不知而不肯

闕也今不依章句妄生穿鑿以遵師爲非義意說爲得理
輕侮道術寢以成俗誠非詔書實選本意改薄從忠三世
同常道專精務本儒學所先臣以爲博士及甲乙策試宜
從其家章句開五十難以試之解釋多者爲上第引文明
者爲高說若不依先師義有相代皆正以爲非五經各取
上第六人論語不宜射策雖所失或久差可矯革詔書下
公卿皆從防言十六年拜爲司徒延平元年遷太尉與太
傅張禹參錄尙書事數受賞賜甚見優寵安帝卽位以定
策封龍鄉侯

韓伯俞

韓伯俞縣之伯俞村人事親至孝有過其母笞之泣母曰他日笞子未嘗泣今泣何也對曰俞得罪笞嘗痛今母之力不能使痛是以泣也魏陳思王植靈芝篇曰伯俞年七十綵衣以娛親慈母笞不痛歔歔涕沾巾隋書循吏傳梁顏先爲相州刺史有滏陽人焦通性酗酒事親闕禮爲從弟所訟彥先弗之罪將之學令觀於孔子廟於時有韓伯俞母杖不痛哀母力弱對母涕泣之像通遂卒爲善士宋節士林同子真咏韓伯俞云母力今衰矣悲涕得杖輕風流在繪像猶足感焦生伯俞身後其至性感人猶如此惟瑜作瑜則傳寫之異耳

魏

丁儀 弟廙

丁儀字正禮沛郡人也父冲宿與太祖親善時隨乘輿見國家未定乃與太祖書曰足下平生常唱然有匡佐之志今其時矣是時張楊適還河內太祖得其書乃引軍迎天子東詣許以冲爲司隸校尉後數來過請將飲酒美不能止醉爛腸死太祖以冲前見開導常德之間儀爲令士雖未見欲以愛女妻之以問五官將對曰女人觀貌而正禮目不便誠恐愛女未必悅也以爲不如與伏波子楸太祖從之尋辟儀爲掾到與論議嘉其才朗曰丁掾好士也卽

使其兩目盲尙當與女何況但眇是吾兒誤我時儀亦恨
不得尙公主而與臨菑侯親善數稱其竒才嘗應教作周
成漢昭論曰成王昭帝俱以襁褓之幼托於冢宰流言纒
與此其險難相似者也夫以發金籐然後垂泣計日力便
覺詐書明之遲速既有差矣且叔父兄子非相嫌之處異
避君臣非相信之地霍光懼人諂而不緇周公賴天變而
得知推此數者齊本而論未計重而况輕漢昭之優周成
其明者也成王秀而獲寶其美在終昭帝苗而未秀其得
在始必不得已與夫始者太祖既有意欲立樞而儀又共
贊之及太子立欲罪儀轉儀爲右刺姦掾欲儀自裁而儀

不能乃對中領軍夏侯尙叩頭求哀尙爲涕泣而不能救
後遂因職事收付獄殺之廙字敬禮儀之弟也文士傳曰
廙少有才姿博學洽聞初辟公府建安中爲黃門侍郎廙
常從容謂太祖曰臨菑侯天性仁孝發於自然而聰明智
達其殆庶幾至於博學淵識文章絕倫當今天下之賢才
君子不問少長皆願從其游而爲之死實天之所以鍾福
於大魏而永授無窮之祚也欲以勸動太祖太祖答曰植
吾愛之安能若卿言吾欲立之爲嗣何如廙曰此國家之
所以興衰天下之所以存亡非愚劣瑣賤者所敢與及廙
聞知臣莫若於君知子莫如於父至於君不論明闇父不

問賢愚而能常知其臣子者何蓋由相知非一事一物相盡非一旦一夕况明公加以聖哲習之以人子今發明建之命吐永安之言可謂上應天命下合人心得之於須臾垂之於萬世者也廋不避斧鉞之誅敢不盡言太祖深納之

丁謚

丁謚字彥靖父斐字文侯初斐隨太祖太祖以斐鄉里特饒愛之斐性好貨數請求犯法輒得原宥爲典軍校尉總攝內外每所陳說多見從之建安末從太祖征吳斐隨行自以家牛羸困乃私易官牛爲人所白被收送獄奪官其

後太祖問斐曰文侯印綬所在斐亦知見戲對曰以易餅耳太祖笑顧謂左右曰東曹毛掾數白此家欲令我重治我非不知此人不清良有以也我之有斐譬如人家有盜狗而善捕鼠盜雖有小損而完我囊貯遂復斐官聽用如初後數歲病亡謚少不肯交游但博觀書傳爲人沈毅頗有才畧太和中常住鄴借人空屋居其中而諸王亦欲借之不知謚已得直開門入謚望見王交脚卧而不起而呼其奴客曰此何等人促呵使去王怒其無禮還具上言明帝收謚繫鄴獄以其功臣子原出後帝聞其有父風召拜度支郎中曹爽宿與相親時爽爲武衛將軍數爲帝稱其

可大用會帝崩爽輔政乃援謚爲散騎常侍遂轉尙書謚
爲人外似疎畧而內多忌其在臺閣有所彈駁臺中患之
事不得行又其意輕貴多所忽畧雖與何晏鄧颺等同位
而皆少之唯以勢屈於爽爽亦敬之言無不從故于時謗
書謂臺中有三狗二狗崖柴不可當一狗慙默作疽囊三
狗謂何鄧丁也默者爽小字也其意言三狗皆欲嚙人而
謚尤甚也奏使郭太后出居別宮及遣樂安王使北詣鄴
又遣文欽令還淮南皆謚之計司馬宣王由是特深恨之
論曰丁謚何晏鄧颺致身曹氏司馬家兒之攀龍鱗附鳳
翼者黨邪醜正播爲謗書魏志載其詞而不復論其世則

甚矣史氏之疏也夫即以狗論丁謚三人亦晉靈之契而
不受趙盾之嗾者也竊人之國而必使一時材俊皆崩角
於新王之馬前斬季布而封丁公興朝之社稷將誰與守
赤縣神州不再傳而淪於夷狄固其宜耳詖遁之辭於公
義之不可奪者往往誣及私德近世有著書以申范者雪
蔚宗也一家之言一時之是非其不足論定天下士也久
矣

嵇康

嵇康字叔夜父昭字子遠督軍糧治書侍御史兄喜字公
穆晉揚州刺史宗正喜爲康傳曰家世儒學少有雋才曠

邈不羣高亮任性不修名譽寬簡有大量學不師授博洽
多聞長而好老莊之業恬靜無欲性好服食常採御上藥
善屬文彈琴咏詩自足於懷抱之中以爲神仙者稟之自
然非積學所致至於導養得理以盡性命若安期彭祖之
倫可以善求而得也著養生篇知自厚者所以喪其所生
其求益者必失其性超然獨達遂放世事縱意於塵埃之
表撰錄上古以來聖賢隱逸遁心遺名者集爲傳贊自混
沌至於管甯凡百一十有九人蓋求之於宇宙之內而發
之乎千載之外者矣故世人莫得而名焉虞預晉書康家
本姓奚會稽人遷于譙之鉅縣改爲嵇氏取稽字之上山

以爲姓蓋以志其本也一日鍾有嵇山家於其側遂氏焉
魏氏春秋曰康厲居河內之山陽縣與之游者未嘗見其
喜愠之色與陳留阮籍河內山濤河南向秀籍兄子咸琅
邪王戎沛人劉伶相與友善遊於竹林號爲七賢鍾會爲
大將軍所昵聞康名而造之會名公子以才能貴幸乘肥
衣輕寶從如雲康方箕踞而鍛會至不爲之禮康問會曰
何所聞而來何所見而去會曰有所聞而來有所見而去
會深銜之大將軍嘗欲辟康康既有絕世之言又從子不
善避之河東或云避世及山濤爲選曹郎舉康自代康答
書拒絕因自說不堪流俗而非薄湯武大將軍聞而怒焉

初康與東平呂昭子巽及巽弟安親善會巽滯安妻徐氏而誣安不孝囚之安引康爲證康義不負心保明其事安亦至烈有濟世志力鍾會勸大將軍因此除之遂殺安及康康臨刑自若援琴而鼓旣而歎曰雅音於是絕矣時人莫不哀之初康採藥於汲郡共北山中見隱者孫登康欲與之言登默然不對踰時將去康曰先生竟無言乎登乃曰子才多識寡難乎免於今之世及遭呂安事爲詩自責曰欲寡其過謗議拂騰性不傷物類致怨憎昔慚柳下今愧孫登內負宿心外赧良朋康所著諸文論六七萬言皆爲世所玩詠世語曰母丘儉反康有力且欲起兵應之以